

RIJEČ REDAKCIJE

Ovaj broj časopisa u koncepcijskom smislu nije promijenjen u odnosu na posljednje brojeve časopisa. Počinjemo sa rubrikom *Članci i rasprave*, u okviru koje objavljujemo šest članaka (Esad Kurtović, *Prilog historiji vlaha Gleđevića*; Hana Younis, *Skice porodičnog života u Sarajevu u posljednjim decenijama osmanske vladavine*; Željko Karaula, *Hrvatska (republikanska) seljačka stranka (HRSS) Stjepana Radića i crnogorski federalisti (1923.-1929.)*; Adnan Velagić, *Obnova i društveni razvoj Hercegovine od 1945. do 1952. godine*; Tomislav Išek, *Koncepcije osnivača i lidera H(P-R)SS prema teritoriju i narodima Bosne i Hercegovine* i Iljas Hadžibegović, *Socijalna struktura Slovenaca u Bosni i Hercegovini od sredine 19. stoljeća do 1992. godine*). Radi se o člancima koji su isključivo pisani za ovaj časopis. Jedini izuzetak je članak profesora Hadžibegovića, koji je urađen prije nekoliko godina u okviru projekta "Slovinci na prostoru nekadašnje Jugoslavije van Slovenije", koji je rađen u okviru Inštituta za nacionalna vprašanja iz Ljubljane. Voditelj projekta je bila dr. Vera Kržišnik-Bukić. Kompletna verzija će biti objavljena u posebnom zborniku, a mi ovdje, uz saglasnost dr. Vere Kržišnik-Bukić, objavljujemo znatno skraćenu verziju.

U rubrici *Historijska građa* Mina Kujović donosi nekoliko dokumenata iz 1941. i 1942. godine o uređenju i radu dotrajale i u ratu oštećene Isa-begove banje u Sarajevu. Ovi dokumenti ne govore samo o stanju Isa-begove banje u Sarajevu u vrijeme rata, nego se čine i veoma aktuelnim, s obzirom na stanje u kojem se danas nalazi ovaj objekt.

Zadržali smo i rubriku *Izlaganje sa naučnih skupova*. Ovdje objavljujemo jedno izlaganje Edina Radušića o stavu Islamske zajednice prema raspadu Jugoslavije, i izlaganje Ibrahima Karabegovića o radu Vere Kržišnik-Bukić na proučavanju Cazinske bune 1950. godine.

Kao i do sada, na kraju je rubrika *Prikazi*. I ovoga puta objavljujemo niz prikaza, od kojih mnoge pišu mladi historičari, studenti na dodiplomskom ili postdiplomskom studiju. Time želimo doprinijeti razvoju interesa kod mladih generacija za proučavanje prošlosti. Naravno, ponovo ističemo da autori priloga odgovaraju za naučna gledišta, koja nisu uvijek odraz mišljenja Redakcije časopisa.